

Ulloq 22. juni 2018 Nuummi Hans Egedep Illuani nalliuttorsiorpaluttumik katerisimaarnermi Vera Arnatsiaq Lethip kuultiusumik Nersornaaserneqarnerani Inatsisartut Siulittaasuata Hans Enoksenip oqalugiaataa.

Asasara Vera Leth,

Nuannaarutigeqaara illit qaaqqusatillu kuultiusumik Nersornaaserneqarnissannut maanga Hans Egedep Illuanut nalliuttorsiorpaluttumik katerisimaarnermut tikilluaqqusinnaagassi. Vera Leth, taamatut nersorniarneqarputit sivisuumik tunniusimallutillu ukiuni 22-inngulersuni nunatta Ombudsmandiatut sulisimanerit pissutigalugu.

Inatsisartut Siulittaasoqarfiata kuultiusumik Nersornaaserpaatsit piffissami sivisuumi annertuumillu nunarput pillugu nersortarialimmik suliaqarsimanerit pissutigalugu.

1997-imi Ombudsmanditut siullermik ivertinneqarputit, tamatumalu kingorna 1997-imiit ukiut tamaasa Inatsisartunit, iluarisimaarneqarlutit tapersorsorneqarlutillu, qinerneqaqqittarlutit.

Nunatsinni Inatsisartut 1995-imi aprilip aallaqqaataani Ombudsmandeqalermatali ombudsmandiusartut taamaallaat aapparaatsit.

Ukiut ingerlanerini Ombudsmanditut atuunninni ingerlassimasatit amerlaqaat, matumani tamakkerlugit taakkartorsinnaagunangisakka.

Vera Leth, Nersornaat kuultiusoq una maanna Inatsisartut sinnerlugit ilinnut tunniutiligara inuiaqatigiit sinnerlugit ilinnut qujaniarnitsinnut ersiutaagili.

Qamanga pisumik pilluarit.